



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

South Korea: Han impeach asüba ruling party-i magizüker

ICC Women's Emerging Cricketer of the Year atema Patil shimogo



VOL. XXII ISSUE NO. 77 (ADOK 77)

DIMAPUR

AMUNGNÜ (SUNDAY)

LUCHII (DECEMBER) 29, 2024

₹ 5.00

NSCN/GPRN (Khango)-i jangjashitsür

Dimapur, December 28, 2024 (TYO): Aolemba Longkumer-i DPR nung lateta aliba mapa meinyakba den iba mapatong atema sen lezmüksüba tim mesüi amshiba atema Rs 50 lakh 'penalty' meshi ta NSCN/GPRN (Khango)-i metetdaksü.

NSCN/GPRN (Khango) cabinet senden ka amenba sülen iba sangdong agütsü.

Sorkar ket nung kulitem peria dang lir aser nungdakra yimjak nung metetdaksütsü ta NSCN/GPRN (Khango)-i ashi.

Iba ken o dak sendaka aliba CSOs (civil society organisations)-i tamasa kechiba NSCN sorkari iba mapa inyak kuli metetsü mepishir ta parnokisa ashi.

Nagaland nung contractors/suppliers ajaki DPR nung lateta aliba ama mapatem inyaksü tetuyuba agütsür ta NSCN/

GPRN (Khango)-isa metetdaksüogo.

Parnokisa bangdakpur dang mapatong inyakba jungjunga reprangtsü mepishiogo.

Naga nunger alidak terenlok bener arutsüba sen contractors/suppliers-i tim mesüi agiba atema NSCN/GPRN-i ola adoktsü kechiyong iba ajanga Naga lanuputu tarutsü raksatsür ta parnokisa metetdaksü.

"Alima nung Naga nunger ajaki tatembang lemetet ka agütsü yongyaa alidang CSO lennir kari Naga nunger dang civil war/azütokshi renema alitsü sangoktsüba angashidang temulung raksar. NSCN tangatetba tejangja lir aser ibaji Naga nunger tsüngda azütokshi kodanga madokdaksütsü" ta NSCN/GPRN (Khango)-isa metetdaksü.

Telok balalai Aolemba Longkumer dang sen meshiba aitsür

Dimapur, December 28, 2024 (TYO): NSCN (Khango)-i December 16, 2024 nü Aolemba Longkumer dang tashiyim agi sen lakh 50 meshiba khukhua aitsür ta Ao Senso Telongjem Dimapur (ASTD)-i Honibarnü metetdaksüogo.

ASTD-i Aolemba'er ki tonga oa pa den ajurutepa osang metetpelaba sülen tanü osangbener den senden ka amendang Aor aser Naga senso tajung ka dak yamai tashiyim agi sen meshiba aitsüba metetdaksü.

Naga nunger telok balalai takhangba agütsüba aser talisa Chumoükedima o Dimapur nung Aor lanur teloktemi yashi ayimoktsüba yimym akangakanga pusema nungiter aser tatem tashi iba ken o atema inyaksü ta ASTD-isa ashi.

Maneni, Nagaland Tribal Youth Organisation (NTYO) nung Coordination Committee-ia iba inyakyim aitsüba metetdaksüogo.

NSCN/GPRN (Khango)-i 7th Mile Chümoukedima nung alir aser ajaki meteta aliba entrepreneur Aolemba Longkumer dang Rs 50 lakh tashiyim agi meshiba aitsür aser

ibala inyakyim ya magizüker ta NTYO-i ashi.

"Onoki yimjung aser tesünap atema inyaksü aser tashiyim agi sen meshiba mesüra ozüngi alema tax saruba anema akangakanga noktaksü" ta NTYO convenor Vetho Vadeo aser co-convenor RN David Magh nati ashi.

Parnokisa ozüng amertem dang Aolemba Longkumer taküm kümzüka ayutsü atema security agütsütsü ayongzükogo.

Naga innovator aser social entrepreneur Aolemba Longkumer-i State aser National jenjang nung sempet aika anguba dang masü saka tangaleni Naga handicraft yoker mezümpurtem lir ta Chumoükedima aser Dimapur nung Naga lanur telok balalai metetdaksüogo.

Aolemba dang sen meshir anaji NSCN (Khango)-i tekaratiba nung bangdakpur ket nung agütsütsü akhanger. Ceasefire Monitoring Group (CFMG) aser Ceasefire Supervisory Board (CFSB) Chairman ajanga iba mapa ya inyaksüla ta Naga lanur teloktemi metetdaksüogo.

"Nagaland for Christ" ta yimym ayimoktsüba Naga

Political Group (NPG) kati benjung mapang Khristan tesayuba sülen anidaksü melena ken o tiyazü shia tashiyim agi sen aika meshiba angudang süngmanger ta parnokisa ashi.

Naga nunger tashiyim agi sen saruba agi khuret agi mapang talangka timtema arur. Kija aser telok kar taginüba ajanga Naga nunger lanur tarutsü meraksadaksütsü ta lanurtemisa ashi.

Iba sangdong nung Co.ordination Action Committee, Convenor, Co.ordination Action Committee, Secretary, Chumukedima Town Youth Organisation, Foothill Ao Youth Organisation, Public Grievances Cell, BAN, Chumukedima Ao Youth Organisation, Dimapur Ao Youth Organisation, Medzhiphema Ao Youth Organisation, Diphupar Ao Youth Forum, aser Ao Students Union Dimapur tanishirtemi sign süa lir.

Maneni, Ongpangkong Senso Telongjem Dimapur (OSTD), Ao Lanur Telongjem (ALT) aser Ao Kaketshir Mungdang (AKM) teloktemia sangdong balala ajanga iba inyakyim khukhua aitsüba metetdaksüogo.

Tenla kidang "Jai Shri Ram" ayimer anema FIR benok

Shillong, December 28, 2024 (Agencies): Meghalaya nung social media influencer ka aser pa den nisung anati tenla ki telung nung yimym ayimba video ka prokshiba sülen FIR ka benokogo.

Influencer Akash Sagar-i pa indang Instagram account nung video ka sayuba sülen iba tatalokba meteta aküm.

East Khasi Hills district kübok Mawlynng nung aliba Church of Epiphany telung Akash-i atur aser idangji pai "Jai Shri Ram" dena tamangba yimsü yimym kar ayimba video nung lir.

Iba atema Shillong nung social activist Angela Rangad-i Laitumkhrach Police Station nung FIR benok.

Küm 30 sülen Mokokchung nung 1994 küm December 27 nü Ayatai lendong atalokba bilemtetba sentong aka



Mokokchung nung 1994 küm December 27 nü Ayatai lendong atalokba bilemtetba sentong 2024 December 27 aonung akadang tesentepertem temo milen amer adener aser Wb.Lanukaba Imchen aser Wb.M.B.Longkumer tenati jembidang tangokba noksa nungji angur.

Mokokchung, December / Luchii 28 (TYO): Mokokchung nung 1994 küm December 27 nümeimchiri metizüktetsüsa atalokba lendong bilemtetba sentong Mokokchung Police Point nung Ao Senden-i ayongzüka nübur aika adenshia kaogo.

Sentong ketdangsür Ao Senden Tatong Tir, Wb.Aowati Ozükum ajanga tarur pela agizüka jembiba den 1890 küm Mokokchung town kümteter kelen Mokokchung asoshi tamangtiba anogo bilemteta Ao Senden iba sentong ya taoba küm 30 tejaklen 1994 küm December 27 nü lendong atalokba bilemteta amongba den

Mokokchung asoshi tarutsü putu tesangwa ka mangdang yur iba sentong ya agirta tarurtem ayongzüka jembiba.

Sentong nung 1994 küm December 27 nü lendong atalokba indang mezüngbuba jembir Wb.Lanukaba Imchen ajanga Naga lima India nungeri rishikangshia aruba tatalokba otsütem aika rasaa telok den lemsatep.

1956 küm Ao lima yimtsüng aika nung ki rongtoktsü aser iba sülen 1958 küm Armed Forces Special Act (AFSPA) amenoker Indian Army-i Naga nunger mapang balala nung rishikangshia arubatem Lanukaba-isa lemsatep. Lanukaba-isa 1994 küm

December 27 nü lendong atalokbaya tapi agi inyakba masü saka Indian Army-i jilia renemer ataba sentong ka liasü, iba anepdang Mokokchung Deputy Commissioner telidak ki aser Office tashi nung telephone disconnect sütsür liasü aser anepdangyongi Ward aika nung ki lapoka senti rongsen aika auya aser town tiyong nung anepdang 10 Ako minute 11 süir injang yoka iba "Ayatai" mapa ya inyakta metetdaksü.

Iba anogo nisung 5 rongset, nisung 2 kaset, NSCN-K pur 3 kaset, Indian Army Colonel-1 aser Army-1 ta kaset, ki- 84 rongtok, doka-89 rongtok, gari-17 rongtok aser

Two wheeler-7 rongtoktsüba den tetsür aika tashiyim agi raksatsü saka tetsür 8-i dang tasü ita kuli asü, parnok 8-i tasü ita kuli asüba ajanga National Human Rights Commission-i (NHRC) Mokokchung semdangbaji Mokokchung asoshi takok ka liasüta Lanukaba-isa metetdaksü.

Lanukaba-isa iba anogo atalokba tejangja kulitem metetdaksüba den nüburtemi küm 30 jungaka iba tatalokba temelungjang nungi maitoktetersaka iba nungtem nung "AYATAI" lung azünga ayuba samatokba asoshi tesasaba olen ka lemsatepa liasü.

Tanabuba jembir

Wb.M.B.Longkumer ajanga 1994 küm December 27 nü lendong atalokba otsü tejangja bushitsüngdangtsü asoshi luden 4 shim item rong nung Delhi-i oagi NHRC ajurua nungtakren jembitsü asoshi nisung ka luden nung pa shimteta NHRC ajurutsü asoshi 1995 küm January 17 nü apusoa or kelen maparen ajak takok ngua inyaktetsüsa NSUD, NPMHR telok-2, iba den Member of Parliament Wb.Imchalemba, Dr.Lanusashi Longkumer, Wb.Amba Jamir, Wb.Akum Longchari aser Dr.Aokumba nungeri nungita yariba ajanga takok ngutetba telok den tepelaba o lemsatepa liasü.

(Maneni tapak 2 nung...)

Tetsürtemi Miss Phek 2024 Hüralü Dzüdo nem tenüngsang agütsü



December 28, 2024 nü Miss Phek 2024 Hüralü Dzüdo den Upper Khomi Village nungi lennirtem külemi agiba noksa ka angur.

Kohima, December 28, 2024 (TYO): Phek district kübok Upper Khomi Village nung Women Society-i Miss Phek 2024 Hüralü Dzüdo nem tetushi aser tenüngsang agütsüba sentong ka ayongzüka agiogo.

Iba sentong ya Honibarnü Rülezhö, Upper Khomi Village nung agi.

Iba sentong nung Village Council Chairman Nüvecho

Vero, Women Society züngsem Shevocolü Hühzü, Upper Khomi Youth Organization (UKYO) President Nükuzo Cürha aser Upper Khomi Students' Union (UKSU) President Düpoyi Nienu nungeri o tatsütsü jembia liasü.

Upper Khomi nung tantsütüla Rüdakhulü Cürha-i Miss Phek 2024, Hüralü Dzüdo nem temoatsü meshitsü aser Hüralü Dzüdo-i lai tetoktepba nung

shilem agia aruba osang lemsatöp.

Maneni, yimtsüng nung tambutisang Thüpujo-i Dzüdo nem Rüliphi (blessing) agütsü aser moatsü.

Iba sentong nung Thünovelü Hühzü menden liasü, Shovotsölü Cürha-i temoatsü meshia sarasadem aser Upper Khomi Baptist Church Pastor Hüsapa Rüho-i tenüngsang agüja sarasadema liasü.

Manipur nung temeten meshia ghonda 24 mokdang

Imphal, December 28, 2024 (Agencies): Manipur kübok Salungpham nung lendong atalokba dak sendakba nung Joint Action Committee (JAC)-i ghonda 24 mokdang ayongzüka agiogo.

Hokolbar nikondang 6:00 ako nungi mokdang tenzüka liasü. Thoubal district police commando temi parnoki arishi küm village volunteer Laishram Prem tepsetba atema temeten meshia iba sentong agi.

JAC-i ayongzüka sentong nung local clubs, civil society organizations (CSOs), aser Coordinating Committee on

Manipur Integrity (COCOMI) Women's Wing ajanga yaritöp.

Manipur kübok lendenlen lenmangtem azüngazünga aküm, sorkar office tem nung mapa inyakertem kanga ajema liasü aser shishilembadak ajak shibang. Ajisüaka essential services aser medical emergencies tenokdangba kübok medendaktsü.

Laishram Prem asüba dak sendakba nung shilem agir police ajak merenshitsü aser Salungpham nung village defence volunteers 6 pua aliba chioktsü atema JAC-i

takhangba agütsür.

Iba lendong ya December 14 nü Salungpham High School anasa atalok aser nisungtem kanga jashiteper.

Lanurji khatepdang khaset aser pa ya telungpur telok ka nung züngsem liasü ta Manipur Police-i ashir. Ajisüaka JAC aser local meira paibis (women activists)-i ashiba agi Laishram Prem ya village volunteer ka liasü aser telungpur telok kecha den-a sendaktepa maliasü ta ashir.

Parnoki akhangba ama meinyak tashi Laishram Prem mang magizüktsü ta JAC-i ashir.

Küm 30 sülen Mokokchung nung 1994 küm... (TAPAK 1 NUNGI...)



Mokokchung nung iba tatalokba otsüren lemsateptsü asoshi 1995 küm January 25 anogo New Delhi nung NHRC Chairperson den senden amen aser iba mapang nung tatalokbatemji angateta iba senden nung Chairperson-i exgratia crore-1 agütsütsü nangzük aser tekaraba nung Mokokchung semdangtsü nangzükba ama 1995 kümsa April 26 nü Chairperson-i züngsem 6 anir Mokokchung-i aruagi lendong atalokba tesemtem repranga lendong nung tasür kibong aser teraksa

atalokertem ajurur oadokta M . B . L o n g k u m e r - i s a metetdaktsü.

1995 küm April 26 NHRC pur den Mokokchung nung nübur teshimtetpur den senden ka Mokokchung Town Hall nung amen aser iba senden nung NHRC Chairperson-i Mokokchung nung teraksabatem yanglutsü asoshi Prime Minister dang sen crore-1 meshitsütsü nangzükba Longkumer-isa telok dang metetdaktsü.

Longkumer-isa 1994 küm December 27 nü Mokokchung

nung iba tesüngmangtsü lendong atalokba osang angashia alima dang mulungkhu sayua New Delhi nung 1995 January 28 nütelok tentet 35 tashi-i shilem agia Mass Public Rally agiba metetdakja liasü.

Kumlong Baptist Arogo, Pastor Wb.Kikum Longkumer-i lai zünga sarasademer iba sentong tenzüka den Lenjeter teloki "Ayatai" ta asüba ken aten aser Süngkomen Baptist Arogo, Asst.Pastor Wb.Matsüng Longkumer-i lai zünger kelen pa leniba nung 1994 küm December 27 nü lendong nung asürtem nem akhüm tetushi agütsüba mapang agiba den pai tatem sarasadem agia iba sentong tembanga liasü.

Mokokchung Police Point nung 2024 December 27 aonung 6:00 ako nungi tenzüka iba sentong agiba mapang Ao Senden, Watsü Mungdang, Ao Kaketshir Mungdang, Mokokchung Town Lanur Telungjem, Ao Lanur Telungjem, Arogo balala nungi tenzükertem aser nübur aika adenshir sentong agiba tepeyong temo milen tsükloka amer iba sentong kanga dang takok ngua agia liasü.

NITI Dimapur Center-i Free Career Guidance Talk ayonger

Dimapur, December 28, 2024 (TYO): NITI Dimapur Center-i January 4, 2024 nü Free Career Guidance Talk ka ayongzüka agitsü.

Iba sentong ya NITI Dimapur Marwari Patti centre nung anepdang 10:00 ako nungi tenzüksü aser Class IX nungi Class XII kaketshirtem den NEET & JEE exams repeaters jaokogo.

Iba sentong nung kaketshirtem den külemi tsüraburtemi medical aser engineering careers atema

shisalen sayurtem den ajurutepa sensaksemtsü jaoker ta NITI Nagaland MD Ajay Sethi-i sangdong ka nung ashi.

Maneni, NITI Dimapur Center nung December 31 nungi January 2, 2025 tashi Küm Tasen benjungmong atema class magitsü. January 3, 2025 nungi ang Class tenzüksü ta Ajay Sethi-isa ashi.

Nagaland aser temeket nung alir ajak den Küm Tasen 2025 salem lemsateper ta paisa metetdaktsü.

NSCN/GPRN-i Dr. Manmohan mang ayimer

Dimapur, December 28, 2024 (TYO): Taoba Prime Minister Dr.Manmohan Singh asüba osang angashia aoksar aser temulung raksar ta NSCN/GPRN-i metetdaktsüogo.

Pa ya India Prime Minister rongnung balaka liasü aser pai Naga yimten tebilemstü atema lenmang sayu ta MIP, NSCN/GPRN ajanga sangdong ka nung ashi.

Pai Naga nunger putiotsü otsü aser yimten temetentem angateta liasü aser pai mera talila agia Naga yimten latettsü temulungtetba liasü ta MIP-i ashi.

December 7, 2004 nü New Delhi nung Collective Leadership, NSCN den olemtep 6 buba alidang "Yimten latettsü

atema akokba tashi merangtsü. Olemtep ajanga dang telok anaprongi haihaura kaa lemtet ka agitettsü. Ajaki agizükteba lemtet ka agitsü onoki janrar. Onoki iba khuret atema nendaka inyaktsü. Onoki akokba tashi yimten latettsü atema merangtsü. Asenok külemi lenmang bushiteptsü" ta Manmohan-i ashiba osang MIP-i bilemtetba lemsatöp.

Manmohan-i India Prime Minister inyakdang NSCN talk team den jembitsü atema minister asem nem mapa lemzükja liasü. February 9, 2005 nü pai Naga teshimtet telok dang tesentaktep indang inyaksangyim latettsü indang nangzükja liasü ta MIP-isa sangdong nung ashi.

Arunachal nung sepaitemi prangpong-injang aika angu

Itanagar, December 28, 2024 (Agencies): Spear Corps aser Arunachal Pradesh Police külem telok kati Namdapha National Park nung mita aodang prangpong-injang aika apu.

Arunachal Pradesh kübok Changlang District nung Miao-Vijaynagar tesem nung iba ya angu.

Assam Rifles, Army aser Changlang District Police külem telok kati advanced technology, tracker dogs aser metal detectors amshia prangpong-injang aika nguteta liasü.

Miao - Vijaynagar road aser

Namdapha National Park & Tiger Reserve telongtet nung parnoki MQ 81 Chinese origin Assault Rifles 10 aser Type 81 Assault Rifles aika ngutet.

Tesüiba ita trok tashi Changlang District nung telungpur teloktemi bushitepa arur saka mengutet.

Yaküm temi madokdang ENNG-i item prangpong-injangtem miima ayu ta osang angazüker.

Osangtem ajanga NSCM (IM) aser NSCN (KYA)-i anir telungpur teloktemi ENNG züngsemtem den külemi item prangpong-injangtem bushitepa aru saka mengutet.

Dimapur Railway station nung tasü mang ka angu

Dimapur, December 28, 2024 (TYO): December 25, 2024 nikongdang 2:40 ako meta Station Manager, NF Railway Dimapur nungi Dimapur Police dang Railway siding nung tasü mang ka anguba osang lemsatepa liasü.

Iba osang angashiba sülen police telok ka tesem tonga yok aser parnoki mon-local male (50 yrs) indang tasü mang angu.

Iba tasü mang NF Railway Dimapur parcel office anasa angu aser shiranga asüba ama

reprang. Police-i tasü mangji District Hospital Morgue-i bener post mortem agiogo.

Tasü sang ya tola temesüng den grey sweater aser sport long pant temesüng agir liasü. Iba tasü mang dak sendakba osang Officer-in-Charge, Govt. Railway Police Station, Dimapur. (Mobile No. 7085055021) den tongteprateptsü akok ta Dy. Commissioner of Police (Crime)/PRO, Dimapur-i mepishia metetdaktsüogo.

Manmohan Singh den tatembangbuba asüpila sentong agiogo



New Delhi, December 28, 2024: Honibarnü Nigambodh Ghat nung Manmohan Singh tasü mang rongdokba, sepaitemi akhüm agütsüba aser asüpila sentong nung Tir Droupadi Murmu, Ato kilonser Narendra Modi, Defence Minister Rajnath Singh aser Home Minister Amit Shah nung adenba noksa nung angur.

New Delhi, Luchi/ December 28 (Agencies): Honibarnü New Delhi nung taoba mapang Ato kilonser, Dr. Manmohan Singh den tatembangbuba asüpila sentong agiba sülen Nigambodh Ghat nung tasü mang rongdokogo.

Singh'er jala tantsüla, Upinder Singh-i tasü mang arondak mi senokja liasü aser yimsü dak sendakba kentem tema tasü mang rongdok.

Honibarnep 8:30 ako nungi 9:30 ako tashi Manmohan Singh tasü mang Congress headquarters nung ayudang party nung inyakertem aikati pa nem akhüm agütsü aser 9:30 ako Congress headquarters nungi tasü mangji Nigambodh Ghat-i bener ao. Yangji linük Tir Droupadi Murmu, Ato kilonser Narendra Modi aser Cabinet Minister temi asür nem tatembangbuba akhüm agüja liasü.

Centre sorkari Manmohan Singh'er kibong aser Congress Tir, Mallikarjun Kharge dang, Singh atema memorial ka yanglutsü atema sorkari ali

lemzüksütsü, ta nangzükogo. New Delhi nung tasü mang rongdokba tesem nung asüpila sentong agiba dak sendakba nung Congress lenirtem mepelai liasü. Congress lenirtemi Centre dang Singh indang memorial yanglutsü tesem nung asüpila sentong agitsü asüngdanga liasü.

Congress lenir, Jairam Ramesh-ibo, sorkari metetsümonga India nung Sikh nungertem rongnungi mezü ngbuba Ato kilonser mezü ngmeshiogo, ta aitsü. December 26 aonung Dr. Manmohan Singh temang mejungi AIIMS Delhi-i anir oa yari saka mekü mzükateti 9:50 ako meta asü.

Singh ya 2004 nungi 2014 küm tashi küm 10 Ato kilonser inyaka liasü.

Asür nem akhüm agüja linük tesem ajaklen nüburtemi anogo tenetnü mangyimtsü sorkari sangdong aser iba mapang nung linük wako tom nung dang ayutsü.

Honibarnü Nigambodh Ghat nung Ato kilonser Modi den

Union Home Minister Amit Shah, Defence Minister Rajnath Singh, tatong Tir Jagdeep Dhankar nungera liasü.

Bhutan Chuba, Jigme Khesar Namgyel Wangchuck-a asür nem akhüm agütsütsü atema India-i arua liasü. Bhutan yimtiba, Thimphu nung aliba Buddhist tekülem kidang putirtemi asür atema sarasademtsüba sülen anogo ka lir Bhutan Chuba Jigme Khesar Namgyel Wangchuck India-i arua asüpila sentong nung aden.

Hokolbar aonung Ministry of Home Affairs-i sangdong ka ajanga, "Congress Tiri sorkar dang Singh indang memorial yanglutsü atema ali lemzü kjang ta mepishia liasü," ta metetdaksü.

Cabinet senden amenba sülen Union Home Minister Amit Shah-i Congress Tir Kharge aser Manmohan Singh'er kibong zü ngsemtem dang, Singh indang memorial yanglutsü atema sorkari ali lemzüksütsü, ta metetdakja liasü.

Punjab sorkari aluyimertem nem ali acre 12,809 agütsüogo

Amritsar, December 28 (Agencies): Punjab state sorkari tang tashi nung aluyimertem nem ali acre 12,809 agütsüogo, ta state minister Tarunpreet Singh Sond-i metetdaksü.

Item aliji sen crore 3,080 shi jenjang lir, ta paisa ashi.

Ali tanaben agiba acre 6,000 lease asü aser 2024-25 kümsük nung ibaji ajanga sen crore 10.76 ajangzük, ta rural development & panchayat minister-isa metetdaksü.

Tan financial year nung rural development & panchayats department-i sen crore 469 agi atema 'shamlat (village common land)' ali acre lakh 1.36 auction asü. Pradhan Mantri Awas

Yojana (Gramin) scheme kübok sen crore 220 indoka ki 18,000 sütsütsü aser tan financial year nungsa ki ajakji renemtsü; iba dak alia 2025-26 kümsük nung ano ki tali 25,000 sütsütsü, ta minister-i metetdaksü.

Item schemes kübok tajangzük angutsüpurtem jangjatsü atema November 1 nungi tenzüka survey agidar aser yimtsü ng ajak nung survey agirtem yoka lir, ta pai metetdaksü.

Taküm Issru yimdak department-i Rural Library Scheme tenzük aser maneni yim aika nunga iba scheme benoktsü; iba ya Chief Minister Bhagwant Mann-i yimtsü ng ajak nung kaketnang

alitsü mangdang yur inyakba maparen ka lir, ta minister-i metetdaksü.

Chief minister-i mezü ngbuba kaketnangji taküm August 15 nü semzükja liasü. Tang Punjab kübok yimtsü ngtem nung kaketnang 114 lir aser ano kaketnang 179 amenokdar.

Department-isa self-help groups nem loan agütsütsü atema bank tem den inyaksangshir, ta ketdangser kati metetdaksü.

Mahatma Gandhi National Rural Employment Guarantee Act (MGNREGA) scheme kübok 2024-25 kümsük nung sen crore 983.98 indokogo, ta paisa metetdaksü.

ALI AYOKER

FOOTHILL LEMANG ANASA VIHOKHU NUNG ALI LEPSA-A AYOKER. TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG. SQFT. NUNG 80/- DIRECT CONTACT : 6009530632 / 6009094225

November ita nung tendangba mozü sample 111 NSQ liasü: CDSCO

New Delhi, December 28 (Agencies): Central Drugs Standard Control Organisation (CDSCO)-i November ita kija nung central drug laboratories nung tendangba mozü 41 'not of standard quality' (NSQ) liasü.

Iba dak alia November ita nungsa state drugs testing laboratories nung tendangba mozü 70-a NSQ liasü, ta ketdangsertemi metetdaksü.

Mozü samples tendangba lenla kar nung meshidaki lira item mozüji NSQ ta zü ngshir. November ita nung tendangba

mozü sample anabo taila liasü aser samples anaji ka Bihar Drugs Control Authority aser ka CDSCO-i bendenba liasü.

Item mozü ajakji nokdangogo, mejangjaba manufacturers-i yangluba aser tanga company tem indang brand tenü ng amshiba liasü.

Mozü balala tendanga NSQ jangjatsü atema mapang shia ketdangsertemi state regulators

den amalitepa inyaker aser item mozüji market nung nokdang, ta kasa osang ajanga metetdaksü.

BJP aser Congress nati AAP indang schemes nokdang: Kejriwal



December 28, 2024 nü New Delhi nung AAP tongti lenir, Arvind Kejriwal aser Delhi Chief Minister, Atishi nati osangbenertem den jembidang tangokba noksa nung angur.

New Delhi, Luchii/ December 28 (Agencies): Honibarnü AAP tongti lenir aser taoba mapang Delhi Chief Minister, Arvind Kejriwal-i, BJP aser Congress nati Delhi nung AAP indang welfare schemes nokdang, ta aitsü.

Congress lenir, Sandeep Dikshit-i tashishiba ken o ka agütsüba nung ajemdaker Delhi Lieutenant Governor-i Aam Aadmi Party (AAP)-i benokba welfare schemes bushisü ngdangtsü tuyuogo.

Osangbenertem senden ka nung Kejriwal-i, BJP aser Congress nati tetsürtem aser teintet sensotem indang AAP schemes nokdangtsü meranger, ta aitsü.

Tang mezü ng BJP aser Congress naprong aija Kejriwal-i, "BJP-i indang-indanga inyaksü tasü maiter, ibayongji Congress lenir Sandeep Dikshit ajanga tashishiba agütsü daksü. AAP nokdangtsü atema Congress aser BJP nati longjemer inyaker," ta ashi.

"Election nung takok anguba sülen onoki tetsürtem nem sen 2,100 aser arrshi küm 60 ser temapur teintet sensotem nem angati medical treatment agütsütsü ta ni sangdongogo. Scheme anaprongla ya nüburtem atema lir, aser item scheme atema nisung lakh aikati tenü ng agütsüogo. Iba ya

ajanga BJP koda mesüi kümdaktsür," ta paisa metetdaksü.

Delhi Lieutenant Governor-i, AAP-i vote agütsütsü temsüa alir tetsürtem nem sen 2,100 agütsütsü nangzükba, Punjab nungi intelligence officers-i Delhi nung Congress candidates kidang nungi inyakba aser Delhi nung assembly election agitsü lia Punjab nungi Delhi tashi sen aika bener aoba metetdaksü.

Kejriwal-i, item ajak ya tiyazü nung tai tongloksüba lir, ta ashi.

"BJP-i ajak anentsütsü atema dang iba election nung tokteper. Parnoki takok ngura parnoki nenok atema agütsüba scheme ajak anentsütsü. Nenoki BJP nem vote agütsüra nenoki Delhi toktsür aotsüsa akü mtsü," ta paisa metetdaksü.

Kejriwal-i, Mahila Samman Card aser Sanjeevani Yojna ama schemes ya tang benoka inyakba mapatem masü saka election mapang tenangzükbatem dang lir, anungji iba nungji kechi bushisü ngdangtsü ali?, ta asü ngdang.

"BJP-i tetsürtem aser teintet sensotem nem welfare schemes magütsüner. Parnoki tetsürtem anemer aser parnok tejakleni moudaktsüner. BJP-i sorkar kümra Delhi ya nisung alitsü majungtsü," ta paisa metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, DECEMBER (LUCHII) 29, 2024

Shi o tanüla na

Asenok taküm ya shi aser tanüla na agi kuma lir, anungji shi o tanüla na prongla kanga tashi itta alitsü nungdaker. Aiben, shii jangrabaji tanüla anema asütsü, ajisüaka tanüla teti pa mulungba nung shi temangji lidaktsüner. Shi temang yabo alima tesem ka nung dang alir saka tanüla yabo ajak nung alir, anungji shi tenük agi manguba lendong aser temoatsütem tanüla tenük agibo angur. Shi temulungjang agi Tsüngremi mulungba mangatetter saka tanüla mulungjangi dang Tsüngremi aginüba meteter. Mapang ka nungbo nü shi temang kanga belemadoker mejangnüsüa akok saka nü tanülaibo memejangi saksalema sarasadema atatsü ajungshitsü akok. Ashiko, tanüla ashibaji mangai temang shii aginüba amai mejangadokra tasüba lendongang ajurutsüa akok. Iba jagi, Yisu asütsüba mapang aser anogo tonga arudang, Yisui kaonung Pa nüsüngtem dang ashi, 'nenok tatidang nung metsüktsü asoshi sarasademang aser saksalema liang. Atangji, nenok tanüla agibo jangrar saka shi nung tashi mait.' (Mark 14:38). Iba Laishiba tekong ya azüng dang, tanüla agibo jangrar saka shi nung tashi maitbaji asenok taküm nunga kechisa asütsü ta asenoka peisasa asüngdangtsüsa adoker. Yisui pa aser pa nüsüngtem dak mapang tatsüka tsüngda nung kechi ataloktsüar meteta liasü. Iba ama mapang ka nung Pa tanüla aser shi nung kanga timtema liasü. Aji oda, parnok jakdang tatidang lendong jenti nenjunga aruba ngua, Yisui par nüsüngtem dang tatidang nungji metsüktsü a tema tashi tasen meshia sarasademtsü ayongzük. Ajisüaka, par nüsüngtemi tanüla mulungba ama meinyaktet. Parnoki parnok tesayuri ashiba ama sarasademtsü melen shi jangraba mekoki amui oa adok. Ashiko, parnok temulungjang nungbo parnok tesayuri ashiba ama amang piyong sarasademtsüla ta jembir asütsüa akok, saka parnok kanga anünü aser amui mao maremtet, ibayongji ken dang masü asemben tashi Yisu aruba mapang parnok amui orr liasü. Alima otsü nung kanga lendong tulu aser kanga tongtipang atalokba mapang ka nung amui aortemji Yisu nüsüngtemji liasü. Shitakba agi Yisu nüsüngtemi Tsüngrem dang par tesayur taküm kümzüktsü asoshi dena asüngdanga sarasademtsüba mapangji ibai liasü. Ajisüaka, sarasadema atatsü melen amui oa adok. Tanü tendaka asen taküm, kibong aser lokti nung aiben tanüla jangraba ama shi nung meinyakteter. Tanülaibo asen apuani atema sarasademtsütsü ashir, asen tanurtem atema sarasademtsütsü ajungshir aser kinünger, medemer aser yimtsüyimertem atema sarasademtsütsü jembir saka asenoki mapang magütsüteter mesüra amuiang oadoker. Yisui asenok asoshi tebu dang sarasademtsür aser yamaji Pai asenoka Pa den külemi sarasademdaksüner. Yisui ashiba angatsü asoshi aiben asenoki timtem aremtsüla. Aiben memejangi mesüra mechiyongi sarasademtsü asoshi tanüla ajungshitsüa akok, idangji asenoki tashi angaa inyakra asenok asoshi temoatsü asütsü. Shi temang lendongi maitsü aser tatidang nung metsüktsü asoshi teti tanüla asenok dang sarasademtsü ajungshir. Asenoki aiben tanüla ashiba mangai shi jangraba mapatem nung dang mapang endoker. Tanülaibo sentepi aotsü, tenla agütsütsü aser temeim mapa inyaksü ajungshir saka asenoki shi jangraba mapatem nem dang kokdatsür aser asen rongsen aser mapang ajunga tanüla mulungba nung masü saka shi jangraba mapatem nung endoker. Iba jagi tatem nung tamakok, tejashi aser tazüngla nung asen taküm atemer. Laishibai ashir, nü mulung ajak agi, nü tanüla ajak agi aser nü tashi ajak agi Kibuba nü Tsüngrem meimang (T.Kunem 6:5). Tetezü asen shi temang aser tanüla ajak agi asen Kibuba Tsüngrem, Yisu Khristai ashiba angatsüba asenok alima nung alirtem asoshi kanga tongtibang lir. Aji oda, asenok shi temang aser tanüla anaprongla kasasa tashi itta alitsüba ibi Tsüngrem o ajanga asenok den jembir.

OLEMSABANG

TENÜKMEREMJI LEP AMA TAOCHI MAKI

- L. Kika Pongener

Leper nung kechisa rema toktsüdir, leper jagi chuba-a suang, alar-a suang, senti rongsen aser senti oseta suang, ajungaji kecha taochi makai meyoka-adoker. "Tenükmeremji lep ama taochi maka" (Solomon Ken-8:6 b). Atangji tenükmeremji lep ama taochi maka ta shisa taka Solomon-i ken atenbaji kanga dang shidak ta asenok-ia agizüker. Adam'er kibong nung adianu ana Kain aser Abel, tena ka sannuker aser ka aluyimer liasü, Kibuba Tsüngremi Abel tenla agizük, kechiaser pai san telok mezüng mepuba nungi tajungtiba Tsüngrem nem tenla agütsü. Saka Tsüngremi Kain-i tenlaba magizük, kechiaser pai Tsüngrem mulong achitsüsa pa tajungtiba nungi tenla magütsü sudi. Ajisuaka, Kain-i pei-i aibelena inyakba mebilemdangi tenu Abel dak tenükmerem aser tenu Abel tepset (Lipok-3:8). Tenukmeremi nisung dak taochi makai tepsettsüa mapayur, aji oda, iba temenenji Kain dak asangsang nung atalokogo.

Ano Mosa anema-a tedi Aron aser teyi Miriam nati tenükmerem aser mokokaji adoka pa anema nem-nem. Tenati ashi, "Kibubai Mosa den dang jembir asü ? Pai asenok dena mejembir no ?" Ajisuaka, Tsüngremi Aron aser Miriam tang ashi, "Tang kü o angang nenok rongnung ainkar kar lira, ni Kibubai kü sasa pa dang mangdang nung metetdaksütsü, ni pa den pongmang nung jembitsü. Saka ni kü tenzüker Mosa denbo yamaji masü..." Pa denbo ni tejak o tejak chitepa, tebang o tebang na agi ajangajanga jembir, tetezütsü agi masü, aser Kibuba temang-a pai angur. Ajangla nenoki kechiba kü tenzüker Mosa anema jembitsü temulong ulur ?" (Züngdangba-12:6-8). Tsüngremi Mosa Israel nunger lenitsü asoshi balaka shimtet, saka tangari masü, par kibong telung nungi tedi Aron aser teyi Miriam nati tang pa dak tenükmerema pa anema tamajung jembir aser anema apuso. Ajisuaka, iba atema Tsüngremi tena dang kanga mepela. Aser iba temenen atakadem Miriam dak rurjep ama mesung-mesunga zütsüra adokdaksü.

Saul chuba-ia Dawid dak tenükmerem adok, aser aji tanga kecha agia masü, saka kodang Dawid-i Filistia nunger temeranger Goliat akok, iba tongpang takok ngur külen, Saul aser Dawid pei yimti-i meyipa shilangdang, Israel-tsürtemi ken yamai tenloktsü, "Saul-i merijang tepset aser Dawid-i merijang ter tepset". Iba ken jagi Saul chuba kanga jashi (1 Samuel-18:7). Dawid-i Saul chuba anema kecha tamajung meinyak, saka Israel-tsürtemi tenungsanga ken tenloktsüba nungi Saul-i Dawid dak tenükmerem aser mokokachi adok aser pa tepsettsü arishia apuso. Dawid-ibo aiben Saul chuba tepsettsü maongka nguaka, pai Saul chuba metepset, kechiaser Tsüngremi shimtetba chuba ka dak teka aitsüba Tsüngrem anema temenen tulu ta Dawid-i züngshi. Dawid-i Saul-i pa tepsettsü arishiaka, pai iba melena tajung dang meyipa agütsü. Anungji iba maongka, Saul melena Dawid-ang chuba akümtsüsa mapangi bentsür aru. Dawid-i pa chuba akümtsü meimlai liasü....Saka pai Tsüngrem pelatsüsa mapa tajung inyakba agi Tsüngremi pa chuba asütsü shimtet sudi ta rajema angateter.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Khristmas anogo nung pastor ki amakdang nisung 3 yiru



December 25, 2024 nü Lahore yimti nung Muslim nungertemi prangpong amshia pastor, Shahzad Siddique'er ki amakdang yiruba Khristantem rongnung ka, Arif Masih hospital nung treatment agidang tangokba noksa nung angur.

December 28, 2024: Pakistan nung Khristmas anogo nung pastor ki ka amakdang Khristan asem yiruogo, ta osang ka ajanga metetdaksü.

Lahore yimti nung December 24 nü Muslim nungertemi ainertem nem timtem agütsüba mapang nung pastor aser sayutsünger, Shahzad Siddique-i Muslim nungertemji nokdangtsü meranga liasü, iba sülen December 25 nü Muslim nungertemi prangpong bener arua pastor Siddique'er kima

minute 25 shi lir assistant sub-inspector ka densema police kar aru. Iba mapang nungjisa Arogo züngsem kar Khristmas benjung amongtsü atema par kidangi arua liasü.

"Ni police dang ozü kima injang khadokba tatalokba tejangja metetdaksüba mapang nung ajungbena lanur kar motorcycle nung aruba sülen onok dak injang khaloktsü. Tia maka ozü kinünger ka, driver aser Arogo züngsem ka ta nisung asem yiru. Injang agi parnok teka, tebok aser tetsünger yiru. Onoki kabo apu saka tanüngba nisungtemjibo motorcycle pongu yutsür jena ao," ta paisa metetdaksü.

Arogo nung züngsem ana-Pastor Siddique'er kinünger Arif Masih aser driver Adnan Pervaiz nabo tera dang yiru saka Akash Patras bo tebok nung injang ia kanga mejungi yirur hospital nung mongdar.

Iba tatalokba dak sendakba nung Police-i melung melemi nisung pongubo puogo aser tanüngba nisungtem maneni bushidar.

Pastor Siddique-i, "Ni yimjung aser tarezmüktep indang sayutsüngia arur, ajisüaka item ama tatalokba ajanga karibo loktiliba nung yimjung maginer ta kuli sayur," ta ashi.

Alima nung Khristantem atema linük tamajungtiba 50 rongnung Pakistan ya jenjang 7buba nung lir (Open Doors' 2024 World Watch List).

Taküm India nung Khristantem anema inyakba tatalokba 745 liasü

December 28, 2024: India nung Khristantem anema inyakba tatalokba teimba-teimba dang akümer, aser taküm-a November ita tembang tashi nung linük nung Khristantem anema inyakba tatalokba 745 liasü, ta United Christian Forum (UCF)-i metetdaksü.

2014 küm India nung Khristantem anema inyakba tatalokba 127 dang liasü saka kümtem süia arudang Khristantem anema inyakba teimba dang akümer.

India nung Khristantem anema inyakba tatalokbatem osang ya UCF-i parnok indang toll-free helpline ajanga bendena liasü.

"Taküm küm tenzüker November ita tashi nung India nung Khristantem anema inyakba tatalokba 745 lir aser iba ya UCF Helpline Number ajanga metetdaksüba lir. Iba tetezü tanga tatalokba-a aika alitsü südi, saka onok helpline nung memetetdaksü," ta New

Delhi nung amenoka aliba UCF-i metetdaksü. Taküm India nung Khristantem anema inyakba tatalokba teimba aliba linükji Uttar Pradesh lir (tatalokba 182), iba sülen tanabuba state ji Chhattisgarh (139) lir.

Taküm India nung state 28 nungi state 23 nungbo Khristantem anema inyakba tatalokbatem liasü, ta parnoki metetdaksü.

UCF-isa tesüiba küm 5 tashi National Commission for Minorities aser National Commission for Minority Educational Institutions nung Khristantembo züngsema maliba atema mepelaba metetdaksü.

Parnokisa Anglo-Indian nem reservations magütsüba aser State Minority Commissions nung Khristantem mezüngokba atema tebilemstü akaba lemsatep.

UCF-isa, Khristantem anema inyakba atema Supreme Court nung ken o benoka lir, ajisüaka 2022 küm mezüng iba ken o

angadanga sülenbo tang tashi iba ken o mangadanger, ta metetdaksü.

Ano külen state 12 nung anti conversion ozüngtem benoka aliba ya yimtenren den sendaktepa lir, ta UCF-i metetdaksü.

Tawa Supreme Court-i Uttar Pradesh nung amendment bill ya PMLA aser UAPA ozüng amai lir aser iba ya ajanga linük temzüng nung Arrla 25 alema inyaksüa akok, ta metetdakja liasü.

UCF-isa, Bangladesh nung minorities anema inyakba sülen India sorkari item tatalokba bushisüngdangtsü atema Secretary-level nung ketdangser ka Bangladesh-i yokogo, yamaji linük nung t a t a l o k b a t e m bushisüngdangtsü atema sorkari inyaksüla, ta takhangba agütsü.

2015 küm UCF-i helpline tenzüker mapang nungi organization-i timtem ajangshirtem yarir aser legal teyaria agütsür.

ANO GO ABEN TSÜNGREM DEN

PA NEM ASEN MERATEM ANIDAKJANG

Nisung mulungjangi pa lenmang tasa asar; saka Kibubai pa meratem anishir.

- Apijemtsü 16:9

Nisung sentong aser Tsüngrem sentong kodanga sako masür. Asenoki taküm lenmang asoshi sentong tapu tapu yanglur saka item ajak tanishisangjibo teyanglur Tsüngrem dang lir. Pa majangi nisung shingaia kecha inyaksü mesüra nokdangtsü makok. Saka aiben asenok meimchiri pei teyanglur amadoker pei sünütsüsüa inyaker aser taküm alir.

Tenyar Paul taküm otsü kodang reprangdir, pai arogotem semdangtsü asoshi sarasadema sentong balala yanglua aji inyaksü merang. Yamaji, pai jangraba ama pa sentong aika atalok, kasaji sentong tamakoka aika ajuruba Lai otsü nung angur. Tenyar Pauli Tsüngremer lenisüba aser tetuyuba nung jajatsü merang, anungji, pai jangraka Tsüngremi mumulungba süra pai pa sentong nungtema ayu.

Tanü, asenok pa dak amangertemia asen taküm ken meyipa shisadangdi. Asen tebilemba mapatem nung Tsüngrem tama sädaktsüogo ma? Asen taküm nung tebilemba, mapa aser lenmang ajak nung Tsüngrem tanishir kümdaktsüdi. Pa lenisüba nung temoatsü taküm ka ka kümdakjang ta sarasadema Tsüngrem nem anidaktsütsü angazükdi. Amen

Khristmas mapang Vietnam nung Khristantem apu

December 28, 2024: Vietnam yimtsünger kar nungi lenirtem nung yimdaklir Khristantem jaoka parnok dang Khristmas amongtsü aser mamongtsü, Khristmas benjung tekülem sentongtem agitsü atema kecha merenemtsü atema renema aliba mapang mesüra linüki memelaba nung ketdangsertemi Khristan Arogotem nung madentsüla, aika apu, ta International mesüra aputsü, ta amokmerena Christian Concern (ICC)-i liasü.

Iba sülen December 21 nü yim aika nungi Khristantem aika apu aser sepaitem aika yokba ajanga Khristantem tetsübu nung dang benjung süidaksü.

Montagnard Khristantemi ashiba agi, ketdangsertemi Khristantem dang kidang Khristmas benjung sübotsü inokra, chiyungtsü balaka renemra, Khristmas ken temra mesüra Khristmas tekülem sentong agira aputsü ta amokmerena liasü.

China nung amai Vietnam nunga sorkari melaba Church organization nung Arogotemi register asütsüla, ta tetuyuba agütsür. Sorkari melaba Arogotem dang Khrista dang nungibo linük nung lenirtem temaba züngshitsü atema tuyur. Vietnam nung aliba house churches aikati ketdangsertemi mita reprangba paidoktsü atema kanga anepongi tekülem sentong agir.

Akhidang nungi sorkari Montagnard aser Hmong densema lisopur Khristantem anema inyaker. Lisopur Khristantem ya yimtenren aser yimsü atema amokmeren ka ama parnoki züngshir. Tawa ketdangsertemi

AO OSHI ANGAZÜKDAK:

TANÜ ANGAZÜKTSÜBA OJANG

Tatsükokdak

(adj) Kümzüka ayudak, tejenokdak (refuge)

* Tzünglu aruba mapang tatsükokdak maka onok timatem.

Tawa

(adv) mapang talangka mesüi, tanü asüng (recently, nowadays)

* Tawa ni yimtaki orr aru.



Tir Yimyim

OLONG PAITEP # 7020

Grid for crossword puzzle #7020 with numbers 1-17.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangliba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7019 TELANGZÜBA

TIPIEN :

- 1. Teti, 5. Aika, 6. Repsem, 7. Osü,
10. Akhüm, 11. Ajuru, 12. Agima,
15. Ako, 17. Amajok, 18. Sang,
19. Akok.

LANGTSÜNGLEN :

- 1. Taret, 2. Tapet, 3. Komo,
4. Talem, 5. Asüku, 8. Saru, 9. Ajak,
11. Amang, 12. Aitsü, 13. Lijak,
14. Takok, 16. Oagi.

NAI-A YA METETTER MA

2024 KÜM BOX OFFICE NUNG SEN TIMTIBA AAZÜKBA MOVIE 10:



- 1. Inside Out 2: \$652.9 million
2. Deadpool & Wolverine: \$636.7m
3. Wicked: \$383.9m
4. Despicable Me 4: \$361.m
5. Moana 2: \$359m
6. Beetlejuice Beetlejuice: \$294m
7. Dune: Part Two: \$282.1m
8. Twisters: \$267.7m
9. Godzilla x Kong: The New Empire: \$195.8m
10. Kung Fu Panda 4: \$193.5m

Assam: PPFA-i ozüng alema arur alirtem meyipayoktsü mepeshi

Guwahati, Luchii/December 28 (Agencies): Ozüng alema linüki arurtem (Bangladesh nungi) dak sendakba nung Assam nung nationalist citizens regional forum kati Union sorkar dang item ozüng alema arurtem bushiteta takaratiba nung meyipa yoktsü asoshi policy takhang ka yanglutsü ayongzüko.

Patriotic People's Front Assam (PPFA)-i sangdong ka ajanga, New Delhi nung sorkari ozüng alema linüki aruba Bangladesh nungertemi timtem agütsüba ya jung junga mangateter ta ashiba den Hindu nung timba aliba tesem nungi parnok matsüngtokdangsa jenjang tapet agitsü nüngdaker ta shisem.

"2016 küm Rajya Sabha nung sensaksema mapang

linük kübok tesem balala nung ozüng alema aruba Bangladesh nung million 20 jenoka lir ta metetdakja liasü. 2014 küm masü tsünga centre sorkari Bangladesh nung million 12 jenoka alitsü ta asateter liasü. Asenoki Myanmar kübok Arakan State nungi Rohingya nung shirnok Bangladesh nungi maneni arudar parnok züngoksemra ozüng alema aru alirtem aika akümtsü," ta PPFA-i ashi.

Northeast India nung amenoka aliba lokti tentet yagi ashiba agi, Assam nungertemi ozüng alema Bangladesh nungertem aruba indang ya linük nem Eighties nung metetdaksüogo, saka national jenjang nung yimden yimsüsürtem aser mainland nung shisakartemi (editor-

journalists densema) Assam nungertem meyong alirongsen ajak item nisungtem yagi amokbangba ya mangateter.

Ozüng alema state-i nüburtem senoka aitba ken o koba Assam nung 1979 nungi 1985 tashi nüburtem longkak aitba mapang metetdaksüogo, iba mapang bentet asübo tanü iba tebilemtsü ya melila, ta PPFA-i ashi.

"Tawa linük nung ozüng alema linüki arurtem anema nokdak tenzüko. Mainstream media outlet temi iba amala osangtem aika sangdonger aser parnok tebilemba lemsateper. Political party balalai longjemer item ozüng alema arurtem ya bushiteta meyipa yoktsü atema jenjang agitettsü magitettsü," ta PPFA-isa shisem.

Meghalaya: Lyngdoh-i Congress-i maongka agütsüba magizük

Shillong, Luchii/December 28 (Agencies): Taoba mapang Trinamool Congress (TMC) MLA George B Lyngdoh-i, state Congress tekolakba Vincent H Pala-i pa dang Congress nung dena district council election nung tokteptsü atema maongka agütsüba magizük.

Lyngdoh-i ashiba agi, Umroi nung tang yimden yimsüsüba jenjang asangba sülen nüjiso nüngdaker ta angateta pai iba telemtetba agia liasü.

Lyngdoh, shiba Umroi Constituency Progressive Forum (UCPF) indang otongdar lir, pai pa MDC election nung metokteptsü ta jangja jangja metetdaksüogo.

Paisa, UCPF-i Congress den madentsü atema telemtetba



Trinamool Congress (TMC) MLA George B Lyngdoh

aser iba ajanga party nung tanaben denshitsü kecha tejangraba magütsür.

Taoba mapang Meghalaya Pradesh Congress Committee (MPCC) tir Vincent H Pala-i ashiba agi, pai Lyngdoh den ajurutepa pa dang Congress nung adentsü atema mepeshia asüngdangogo.

Paisa, Lyngdoh-i pa pusemertem den sensak asema sülen takaratiba nung telemtetba ka agitsü imlar, ta ashi

Lyngdoh, shiba mapang ka nungbo Congress nung tongtibang lenir ka liasü, pa 2022 küm Mukul Sangma aser Charles Pyngrope densema tanga MLA tem den Trinamool Congress (TMC) nung oa dena liasü.

Manipur police-i KCP-PWG telungpur ana apu

Imphal, Luchii/December 28 (Agencies): Manipur Police-i, Imphal West district nung Kangleipak Communist Party (People's War Group) (KCP-PWG) züngsem ana puogo.

Police-i pua aliba telungpur ana ya Md Imtiaz Khan aser Irengbam Gulapi Singh ta jangjaogo, aser tena ya rakzükrakdemba inyakyim nung densema aliba atema puogo.

Tena ya Brehostibarnü Imphal West district kübok Awang Wanagai Lamkhai

tesem nung apu ta police temi Hokolbarnü metetdaksü.

Telungpur ana ya Imphal East district kübok Pangei aser Khongampat tesem nung brick farm, school, oil pump densema establishment balala aser Sekmai, Imphal West district nung health center ka nungi rakzükrakdemba nung densema liasü.

Telungpur ana apuba sülen police-i tena ket nungi mobile phone ana aser tanga osettem nguteta liasü.

December 17 nü Manipur Police-i, Kakching district nung Bihar nungi aruba aayanger ana tepsetba dak sendakba nung KCP-PWG züngsem ti apuba sülen tang ano kasa telok nungi züngsem ana ya puogo.

December 14 nü tatalokba ya Keirak anasa ataloka liasü aser iba ajanga nüburtem kanga mit adoka liasü. Aayanger ana ya tepsetba sülen police-i meita aoba sentong tenzüker aser telungpur ti ya pua liasü.



Dibrugarh: Arunachal Pradesh nung Changlang district kübok Miao-Vijaynagar axis nung MS 27 anasa Security forces temi prangbong injang aser hadir aika ngutetogo. Spear Corps kübok Assam Rifles, Army aser local police longjemer meita aoba sentong ayongzüka liasü. Sepaitem nem high-tech drone, tracker dog, aser metal detector temi teyari agüja liasü.

Ukraine rara nung North Korea nung sepai aika taküm samaogo

Keyiv, Luchii/December 28 (Agencies): Ukraine nung sepaiitemi Russia-i yokba North Korea nung sepai 1000 dak tema tepsetogo mesüra yirutsüogo, ta Kyiv aser South Korea nung ketdangsürtemi metetdaksü.

"Preliminary data ajanga Kursk tesem nung North Korea nung sepai tepsetba mesüra yiruba 3000 dak tema akümba sayuogo," ta Ukraine tir Volodymyr Zelenskyy-i December 23 nü ashi.

South Korea nung itangitertemi North Korea nung sepai 1,100 sür mesüra yirur alitsü ta ashiba den North-i sepai talila yoktsü atema renemdar ta ashi. North Korea-i Russia kübok Kursk tesem nung Ukraine den raratsü atema sepai 11,000 yoka liasü.

North Korea nung sepaiitem ya Ukriane nung drone tem den raratsü atema renema maliasü aser iba ajanga parnok aika süogo. Mapang ka nungbo Ukraine nung drone operator temi North Korea nung sepai kati parnok tangoka aliba drone ka khazüka yoktsü merangba mapang külem sepai ka dak aibelenä khaloktsüba tangokogo.

North Korea nung sepai ka tasü mang nung ngutetba notebook ka nung rasa shia aliba tasa ka benoka inyaksü parnok merangdanga liasü asütsü, ta bilemer.

"Drone ka senzüa aliba putetra nisung asemsem külemi inyaksangshitsüla, kong shibai drone atsür odir pa meter tenet shi pilatsüla aser drone dak akhartem meter 10-12 pilar alitsüla," ta notebook nung zülua liasü. "Drone atsür aosang ya marakzüi nokdaka lira drone-a arakzüba anentsü. Iba mapang nung drone dak akhasang yagi drone khazüka yoktetsü."

Ukraine indang Special Operations Forces-i Telegram ajanga ashiba agi, parnok indang

8th regiment-i anogo asem tsüingda Kursk nung North Korea nung sepai 77 tepsetogo aser 40 dak tema yirutsüogo.

Regiment-i lemsatepba video ka nung, drone temi tsükchirtem amakba sayuogo. Drone tem idang signal ya point-blank range nung oadoker aser iba ajanga drone detonate asüba mapang signal oadaokba sayur.

World War II sülen tang mezüingbuba Russia nung litsü atsüingba ajanga Russia tir Vladimir Putin kanga maksüogo aser October 1 nü tashi nungbo Ukraine nung sepaiitem par litsü nungi mintoktsü tenangzüka agüja liasü.

Ajisüaka atakzüka aliba anogo tonga aruba mapang pa otongdar-i Kremlin tamendakdak meleshia ashiba agi, Ukraine nung sepaiitem ya mapang lemsar mintoktsü. Putin-isa Decemeber 19 nü osangbenertem den sensaksemba mapang, "ni parnok koba nü mintoktsü iba indang shia mataner aser meshitetsü," ta ashi.

Kasa mapang nung Kursk nung rara aliba Ukraine nung sergeant kati ashiba agi, taoba ita tsüingda Russia nungertemi parnok amakba ya sentong junga meyanglui amakba ama reprangtetogo ajisüaka December 24 nü unite asemani nungi teyari dena agüja sentong kanga junga yanglur parnok makogo.

"Item telok asem nungi sepaiitem ket nung jenjang tajung ammunition tem liasü. Parnok ajak ket nung disposable grenade launchers, night vision devices aser assault backpacks tilala liasü," ta Ukraine indang 17th Heavy Mechanised Brigade sergeant yagi ashi. "Item telok asem rongnung ka danga meraksatsü asübo parnok maneni tejakdangi ola," ta paisa shisem.

Item unit tem nung North Korea nung sepaiitema densema alitsü ta amanger.

Ukraine kübok Donetsk tesem kong kanga sashia rara arudar, iba tesem nung Khristmas benjung mapanga kanga sashia raraogo.

December 24 nü Russia nung sepaiitemi Ukraine nung sepaiitem amedaker aliba tesem 248 ben maka liasü, ta Ukraine indang general staff-i ashi. Khristma nü Russia-i Ukraine nung sepaiitem amedaker aliba tesem 200 ben dak temaben makogo.

Iba mapang geolocated footage ajanga Russia nung sepaiitem Kurakhove anüolen nungi aitba sayuogo.

Luhansk Technical University nungi otongdar Anastasia Bobovnikova-i ashiba agi, Toretsk yimti nung Central Mine atema kanga kanga sashia raratepba mapang ka lir.

Ajisüaka Pokrovsk jila temeket nung tesashiba raratepba. Russia-i Ukraine nung sepaiitem amakba pongusü nung quarter bo iba tesem amakba asütsü.

"Pokrovsk ya lenmang aser rail hub tongtibang ka lir aser iba ajanga sepaiitem aser osettsü balala Ukraine anütokleni yoktsü atema teyari agütsür," ta taoba mapang US naval officer, aviator aser diplomat Demetries Andrew Grimes-i Al Jazeera dang ashi.

"Pokrovsk aziokba ajanga Ukraine indang supply line nung tetsükdaksü adoktsü aser Russia nung inyaksangshi tajungba kümdaktsütsü," ta pai ashi.

December 17 nungi December 26 tashi nung Russia nung sepai 17,400 taküm samaba Ukraine indang general staff-i asatetogo, koba ita ka nung 52,200 asütsü. Russia indang recruitment capacity ya ita ka nung 30,000 dak tema masütsü.

South Korea: Han impeach asüba ruling party-i magizüker



Seoul, Luchii/December 28 (Agencies): South Korea acting tir Han mapa nungi anentsütsü atema impeachment motion ya opposition party tongtiba Democratic Party (DP)-i benoka liasü. Tir Yoon impeachment trial achaayangtsü atema Constitutional Court atema obendanger talila shimtsü memulungba sülen Han mapa nungi anentsütsü benoka liasü.

South Korea nung ruling People Power Party (PPP)-i Honibarnü, Opposition-i acting tir Han Duck-soo mapa nungi anentsütsü merangba ka lir ta shia iba inyakyim aitsüogo aser pa mapa nungi agintsü benokba ya magi kümdaktsütsüla, ta ashi.

Opposition-i aniba National Assembly nung Han mapa nungi anentsütsü atema Hokolbarnü vote agia liasü. Tir Yoon Suk Yeol-i December 3 nü martial law benokba atema pa impeach asüba sülen hopta ana majung tsüingda Han impeach asütsü benoka liasü.

Han mapa nungi anentsüogo aser Finance Minister Choi Sang-mok acting tir kümogo.

"Acting tir ka mapa nungi anentsütsü atema tenüngdakbatem metongtet

anungji Han mapa nungi anentsüba ya magi kümdaktsütsüla," ta PPP otongdar Seo Ji-young-i ashi. "DP-i sorkar chirepdaktsütsü merangba ya onoki ajang ajang aitsür," ta laisa shisem.

National Assembly Speaker Woo Won-shik-i, simple majority ajanga acting tir ka mapa nungi anendaktsütsü ta ashiba aija Seo-i ashiba agi, iba telemtetba agiba ajanga administration tashimeiti kümdaktsütsü atema lenmang lapoktsüogo aser iba ya legislative tashi mashiyimi amshiba ka lir, ta Yonhap news agency-i metetdaksü.

PPP-i Hokolbarnü ashiba agi, iba vote ya magitsü, kechiyong Woo-i züingsem 300 agi kümtetba National Assembly nung impeachment indang quorum ya two-thirds majority masü saka simple majority ka ta sangdonga liasü. Cabinet züingsem ka mapa nungi anentsütsü atema simple majority dang nungdaker, saka tir ka mapa nungi anentsütsü atema two-third majority nungdaker.

Hokolbarnü South Korea indang puti otsü nung mezüingbuba acting tir ka parliament-i mapa nungi anentsüogo.

Israel nung sepaiitemi Kamal Adwan Hospital director sota ayu

Gaza, Luchii/December 28 (Agencies): Gaza health ketdangsürtemi ashiba agi, Israel nung sepaiitemi north nung mozüki ka director sota yua lir. World Health Organization-i ashiba agi, Israel nung sepaiitemi iba mozüki ya inyaksangshi mesüi kümdaktsüogo.

"Israel nung sepaiitemi Kamal Adwan Hospital nungi medical staff tem aika ken o ashishitsü atema detention centre kati anirogo, kong director, Hossam Abu Safiyeh densema lir," ta Gaza indang health ministry-i ashi.

Gaza civil defence agency-i, Abu Safiyeh sota yuogo ta ashiba den north nung agency indang director Ahmed Hassan al-Kahlout-a Israel nung sepaiitemi sota alirtem rongnung densema lir, ta shisem.

"Linük atsüingertemi north nung medical, humanitarian, aser civil defence system ajunga raksatsüogo aser tagidak maka kümogo," ta civil defence agency otongdar Mahmud Bassal-i AFP dang ashi.

Hokolbarnü Israel nung military-i ashiba agi, parnoki Kamal Adwan Hospital temeket nung meita aoba sentong ka ayongzüka agiogo. Military-i ashiba agi, iba mozüki ya iba kiralongrar telok atema tongtibang tamendakdak ka lir. Palestine nung militant telok Hamas-i, parnok sepaiitemi mozüki nung amenoka maliasü ta ashiba den Israel nung sepaiitemi kuli tejangja makai iba facility ya Hokolbarnü maka liasü, ta ashi.

Kasa mapang nung World Health Organization-i ashiba agi, Israel military-i meita aoba sentong benoka inyakba sülen iba mozüki ya inyaksangshi asü mejungi kümogo.

"Tanep Kamal Adwan Hospital amakba sülen north Gaza nung health facility tongtibang rongnung tatembangbuba inyaksangshi masü kümogo. Osang ajanga ashiba agi, tongtibang department kar kanga mejungi rongogo aser raksaogo," ta WHO-i X ajanga metetdaksü.



SHALOM PUBLIC SCHOOL

NAGA CEMETERY ROAD, CHÜMOUKEDIMA VILLAGE

CHÜMOUKEDIMA 797103, NAGALAND

(Affiliated to Central Board of School Education)

Email : spschumukedima@gmail.com Contact No: +91 6909621687

Website : www.shalomeducationaltrust.org

VACANCY

1. School Counsellor cum Chaplain.

Qualifications : BA/Bsc +BD + MCP (Master in Counselling and Psychotherapy) or equivalent

Candidates :

- * Must be born again and committed.
- * Must love to work with children and adolescents.
- * Must possess spiritual maturity and guidance skills.
- * Must have excellent communication skills.
- * Must be willing and have the ability to give Pastoral Care and support.
- * Must be willing to relocate near the school campus.
- * Must be Physically and emotionally healthy.

Interested candidates may send their resume and documents with a hand written application to spschumukedima@gmail.com.

Last date of submission 13/01/2025

ADMISSION OPEN FOR ACADEMIC YEAR 2025-2026 (Nursery – Grade 9)

ICC Women's Emerging Cricketer of the Year atema Patil shimogo



Luchii/December 28, 2024 (Agencies): ICC-i ICC Women's Emerging Cricketer of the Year award atema nominee tem sangdongogo. Asayartem rongnung India tsür Shreyanka Patil, South Africa tsür Annerie Dercksen, Scotland tsür Saskia Horley, aser Ireland tsür Freya Sargent nung densema lir.

Shreyanka Patil ya India team nungi mezüngbuba 2023 küm December ita asaya aser iba sülen la ya white-ball cricket nung kanga tongtumbang asayar ka kümogo.

Shreyanka ya bowler ka saka lai lower-order nunga batting junga menteter. Women's T20 Asia Cup aser ICC Women's T20 World Cup nung kanga junga asayaba sülen la India team nung jenjang kanga junga yanglushiogo.

World Cup nung Pakistan den asayaba mapang Shreyanka-i run 14 agütsür wicket 2 agia kanga tongtumbang

shilem agi aser Pak team nem run 105 dang yangludakja liasü. Lai maiden over ka densema ball kanga junga aoba den wicket ka agiba ajanga India team nem iba asayamung nung timla agütsü.

Arishi küm 23 tain Annerie Dercksen ya mezüngbuba 2023 küm South African team nungi asaya liasü. South Africa team 2024 küm ICC Women's T20 World Cup final tonga asayaba mapang lai kanga tongtumbang shilem agia liasü.

Dercksen ya lower-order batter ka lir aser lai maangka anguba shia kanga junga asaya arudar aser England den T20I asaya asem nung lai run 69 yanglua liasü. Lai batting aser bowling naponpla nung teyari agütsüba ajanga lai team koda yaritetsü aji sayur.

Kasa mapang nung Saskia Horley-i Scotland tetsür cricket team nem teyari tulu agüja arudar. La ya Ellyse Perry-i shilem agiba cricket TV show

ka nungi asaya tenzük aser iba sülen lai lar linük atema alizüing aika tongtetsüogo.

Horley-i 2024 küm ODI kanga junga asayaogo, kong la Scotland tsürtem rongnungi century yangluba mezüngbuba asayar akümba densema lir. Laisa, ICC Women's T20 World Cup Qualifiers densema asayamung aika nung batting aser bowling naprongla nung la sempet tajung sayuogo.

Maneni arishi küm 18 tain Freya Sargent ya Ireland team atema kanga tongtumbang asayar ka kümogo. Lai ODI nung tang tashi nung ball tajungtiba anobaji run 29 agütsür wicket 3 agiba asütsü aser T20I nunga run 30 agütsür wicket 3 agiba asütsü.

T20I asaya ka nung England den asayaba mapang Sargent-i mezüngbuba ball aon aser lai tongtumbang wicket asem agia liasü. Iba asaya ajanga team tashi taittem den asayaba mapanga junga asayatetsü la dang sempet aliba sayuogo.

Ind vs Aus: Reddy-i century yanglua India nem timla agütsü



Luchii/December 28, 2024 (Agencies): Nitish Kumar Reddy-i Honibarnü pa indang Test career nung mezüngbuba century yangluba sülen Test pzübuba nung India team nem timla agütsüogo, ajisüaka Melbourne nung anogo asemnübuba asayaba sülen Australia maneni temaba jenjang nung lir.

Test pezübuba nung asayaba mapang arishi küm 21 taina sayar yagi out mesüo run 105 yanglua par team-i asayar 6 out sür run 191 yanglur aliba jenjang yanglushiya run 358 tonga yanglutsü teyari agüja liasü.

Honibarnü asaya tenzük mapang tatsüka tsüingda Rishabh Pant (run 28) aser Ravindra Jadeja (run 17) out

süatokba sülen pa aser Washington Sundar nati over 47 nung run 127 yanglua Australia nung bowler tem tezüdangdakja liasü.

Reddy-i run 97 yanglur aliba mapang Sundar run 50 yanglur out süatok. Iba sülen Jasprit Bumrah batting ameni ait saka pai ball asem nung run ka danga meyangluteti out süatokba sülen Mohammed Siraj ait aser Reddy jenjang mejangjai aküm.

Ajisüaka Siraj-i Cummins' indang over ya out mesüi tembanga mentet aser iba sülen Reddy-i four ka züka pa indang Test career nung mezüngbuba century yanglua liasü.

Iba sülen tsüingsang mejangjai aküm aser iba mapang tashi nung India team-i Australia ano

run 116 agi memenepi liasü. Ajisüaka Reddy-i kanga junga asayaba ajanga tanungba anogo ana nung asaya draw danga asayatsü India team nem timla agütsüogo.

Reddy ya iba asayamung metenzük tsüingda aikatibo mejangjai liasü. Pa international jenjang nung T20 dang asem asayar liasü.

Pa nem taküm Indian Premier League nung emerging player award agütsü, saka pai first-class century ka dang yanglur liasü.

Ajisüaka pai pa arishi küm den meputemi MCG nung pa indang tasa aser temperament sayuogo.

Honibarnü Reddy-i shot tajung aika asaya-a Australia nung bowler tem nongshia asaya liasü. Pai pa out südaksütsü atema maangka kecha magütsü run 97 yanglua liasü, ajisüaka Sundar out asüba sülen century takaratiba nung yanglutsü atema ball züktoktsü merangba mapa pa tera agi out masü. Pai azükba ball ya tera agi dang in-field adena ao aser run ana yanglua liasü, saka run ana yangluba ajanga Bumrah batting amentsüsa aküm.

Bumrah out asüba sülen Siraj out asütsü tsübuseta ataba sülen taruba over nung Reddy-i century ya yanglua liasü.

Nagaland Super League January 28 nü amenoktsü

Dimapur, Luchii/December 28 (TYO): Nagaland Super League Governing Body-i sangdong ka ajanga, mezüngbuba Nagaland Super League ya 2025 küm January 28 nungi March 31 tashi asayatsü ta metetdaksüogo.

Nagaland nung saisapong puti otsü nung tang tapak tasen ka lapoka Nagaland Super League asayatsü lir, aser iba ajanga iba tesem nung sempet tajung aliba asayartem aser nüburtemi football asaya meimba sayutsü.

Nagaland Super League ya 2025 küm January 28 nü officially amenoktsü renema lir. Iba anogo ya kanga dang tongtumbang anogo ka asütsü kechiyong iba anogo ya Naga nung rongnungi ajak dang

nüngtugutiba asayar Dr. T. Ao sor küm 107 ajunga anogo lir. Iba tongtumbang sentong ajanga state nung saisapong ajungketsü atema inyakyim tasen ka tenzükba temaitsü sayutsü.

Nagaland Super League ajanga lanur asayartem aser football asayar tejentem nem state kübok tesem balala nung temaba jenjang nung tokteptsü atema sabang ka agütsütsü. League mezüngbuba season ya asaya, telongjem aser Dr. T. Ao indang legacy benjungba mapang ka asütsü.

Maneni Nagaland nung football asaya ajungketsü atema jangrademtsü aketba season ka asayatsü asoshi yongyaseta ataba Nagaland Super League Governing Body-isa metetdaksü.

Arsenal nungi asayar Saka ita ana dak tema masayatetsü



Luchii/December 28, 2024 (Agencies): Arsenal nungi asayar Bukayo Saka hamstring surgery agiba sülen March ita tashibo masayatetsü ta Arsenal manager Mikel Arteta-i sangdong ka ajanga metetdaksü.

Hokolbarnü kidang Ipswich goal 1-0 agi akokba sülen Arsenal pur Premier League nungi tanabuba jenjangi tuogo. Saka medeni Arsenal puri tang mezüngbuba asaya ka kokogo.

England team nung winger Saka ya taoba hopta tatemi Crystal Palace goal 5-1 agi akokba asaya nung tetsüing tachichilen hamstring yirua liasü.

Arteta-i taoba mapang arishi küm 23 tain Saka ya hopta aika masayatetsü ta shir liasü, ajisüaka par team-i asaya akokba sülen osangbenertem den jembiba mapang Arteta-i ano osang tamajungba-ang agütsüogo.

Iba asaya akoba sülen Arteta-i aniba team yagi Premier League nung temaba jenjang nung aliba team Liverpool maneni nongshidar.

"Pa surgery ka agi aser ajak kanga junga tembangogo, saka tia maka pa ano hopta aika masayatetsü," ta Arteta-i ashi.

"Pa ita ana dak tema masayatetsü. Pa mapang kobika masayatetsü ajibo ni meshitetsü. Mezüngbuba hopta pa indang scar tissue koma taneptsü angur iba dak pa meyipa arua asayatsüba ya keta lir. Tang shia atatsü tasaka lir," ta Arteta-isa shisem.

Ajisüaka Raheem Sterling temang tajungba küma yakta asaya tenzüktsü ta osang angazükba ajanga Arsenal nem timla agütsüogo.

Ipswich den masaya tsüingda arishi küm 30 tain Chelsea nungi loan nung arurang ya temekok yiruba sülen hopta ishikabo masayatetsü ta shir liasü.

Ajisüaka Sterling yiruba ya mezüng bilemba ama kanga tamajungbo masü aser pa yakta asayatetsü.

Arsenal pur tang Liverpool point trok agi memenepi tanabuba jenjang nung lir aser parnok taruba asaya Brentford den New Year nü asayatsü.

BILEMDANGANG

"Taküm asoshi rongsenji (sen) tesendaktep lir,"